

Pauru Nymerohpyry sero Koroxipõkõ Neneryme

Sero pape tymerose Pauru a äpuruypyry tao tahtao Roma po. Ritonõpo nymenekahpyryme kynexine ynororo imehnõ amorepaneme. Tynmerohpyry sero taropose eya Jezu poetory tõ neneryme, Koroxipõkõ neneryme.

Tynmerohpyryae toto amorepãko mana osenekunohpopyra toto ehtohme enekunohtohkomo a. “Jezu kure repe. Yrome Ritonõpo mükuru nymyry pyra mana,” kananõ zae pyra mã toto. Ritonõpome nymyry Jezu mana, ekarõko mana. Naeroro tomeseke sehtone enekunohtohkõ omipona pyra kuehtohkõme.

Pauru nymerohpyry Koroxipõkõ neneryme

1 ¹Ynmerohpyry moro onenerykõme. Ywy ase Pauru. Ritonõpo nymenekahpyryme ase, Jezu Kyrixtu poko imehnõ amorepaneme. Taro Timoteu nase ymaro. Kuakorõkõme ynororo Jezu enetuputyryke eya.

²Ritonõpo poetoryme matose, Koroxipõkomo. Wekyryme matose, Kyrixtu enetuputyryke oya xine. Zae roropa matose, Kyrixtu omipona.

Kure rokẽ oriporykõ se ynanase Ritonõpo a, Kumykomo a, ipoe torẽtyke pyra oehtohkõme.

“Kure mase Papa kapuaono,” kary poko Ritonõpo a

³Ynara ãko tarõkõ yna a opoko xine, “Koroxipõkõ Jezu Kyrixtu omipona mana yronymyryme. Ritonõpo poetory pyno roropa mã toto ipunaka,” ãko toto yna a. ⁴Naeroro opoko xine yna otururuhtao Ritonõpo maro, “Kure mase Papa kapuaono,” ãko ynanase Jezu Kyrixtu Kuesẽkõ zumy a. ⁵Moinoro zae omi etapitotopõpyry poe ro oya xine Jezu Kyrixtu poko, imeĩpo Ritonõpo maro kuexirykõ poko metatose. Imaro oehtohkõ momohnõko matose. “Ymaro exĩko matose,” katopõpyry Ritonõpo a onytyorõmara mana. Naeroro ipoetory pyno matose. Oesẽkõme Jezu enetupuhnõko matose, enara. ⁶Kure kyritorykõ Ritonõpo mana. Kure imehnõ riko roropa mana. Morara kary totase oya xine. Morara kary etaryke oya xine zae aehtoh waro matose. Imehnõ amorepãko matose emero pata to poro. Moraramẽ õmirykõ etaryke tyya xine asã xine Ritonõpo enetupuhnõko mã toto. Kure Ritonõpo orirykõ enetupuhtoh sã oya xine enetupuhnõko mã

toto. Kure toto rîko Ritonôpo mana. Imaro toehthokô momohnôko roropa mã toto. ⁷Eapura kynexine âmorepanekomo, kure Ritonôpo orirykô poko. Mokyro pyno ynanase pitiko rokê pyra. Jezu Kyrixtu poetoryme nymyry ynororo. Zae âmorepatorÿko mana Kyrixtu poko. Âkorehmatorÿko roropa mana yna esahpyo. ⁸Yna zuruase mokyro opoko xine, “Ritonôpo zuzenu poe imehnô pyno mã toto yronymyryme,” tykase ynororo opoko xine.

⁹Naeroro mokyro omiry totase yna a exiryke oturukehpyra ynanase opoko xine Ritonôpo netaryme, “Koroxipôkô akorehmako Papa typoko xine ôsenetupuhtoh waro toto ehtohme. Zae ehtoh poko tuaro tyriko toto popyra ehtoh poko pyra toto ehtohme. Ouzenu a toto amorepapoko Papa,” âko ase Ritonôpo a. ¹⁰Mame Ritonôpo poe zae ehtoh waro awahtao xine aomipona exiko matose. Ritonôpo zamaro matose exiko. Kure rokê imehnô rîko roropa matose, pohto rokê pyra. Mame Ritonôpo warohxo exiko matose. ¹¹Ynara âko ynanase Ritonôpo a, “Papa kapuaono emero motye orêpyra mase. Emero omiry motye ômiry kure mana. Naeroro Koroxipôkomo a ajamitunuru ekarôko mase jamihme toto ehtohme, penekhepyra roropa toto ehtohme opoko, tâkye toto ehtohme toetuarimarykohtao ro,” âko ynanase. ¹²Saerehkane esême Ritonôpo mana. Zae exiketô esême roropa mana. Ipoetory tō roropa zae mana. Tynekarory kurâ kurâkâko Ritonôpo mana ekarotohme typoetory tomo a. Moro eraximâko sytatose. Naeroro tâkye ehtoko. “Kure mase Papa,” kahtoko. Tukurâkase matose Ritonôpo a tymaro oehthokôme, imehnô Jezu poetory tō maro, tuisame exikety Jezu tooehse ropa ahtao. ¹³Tyrypyrykô poko exiketô esême joroko tamuru mana. Ipoetory tō iirypyryme mana. Tyrypyhpyke sexiataose roropa. Joroko tamuru omipona sexiataose. Yrome kypynanopyatose ropa Ritonôpo, Tumûkuru poetoryme kuehtohkôme. Tumûkuru pyno ipunaka Ritonôpo mana. ¹⁴Eya tymyhpokase ropa sã sytatose joroko tamuru poetoryme pyra kuehtohkôme. Kyrypyrykô topehmase eya toorikyryke kymyakâkôme. Kyrypyrykô tykorokase eya mana zae kuehtohkôme.

Jezu Kyrixtu ehtoh poko, inyrihpyry poko, enara

¹⁵Ritonôpo osenepyra mana. Morara exiryke Tumûkuru tonehpose eya sero nono pona zuaro kuehtohkôme. Isã Imûkuru mana ipunaka. Apitoryme tonuruse ynororo Ritonôpo mûkurume. Eya emero tyripose Ritonôpo a. Tynyrytã motye kure ynororo Ritonôpo mûkurume toexiryke. ¹⁶Emero tyrise eya Tummy omi poe, kapuaokô tyrise eya, xixi, xirikuato tôkehko. Nonopôkô roropa tyrise eya Tummy jamitunuru ke, senohne otyro tôkehko. Osenehnô tyrise roropa eya, joroko tō tuisary, ahno tuisary, pata esã roropa, kutuisarykô roropa, kowenu tō roropa, enara. Emero tyrise eya Kyrixtu omipona ehtohme emero porehme. ¹⁷Seropôkô pyra ro ahtao Kyrixtu nae ro ehse. Morara exiryke Jezu poe toehse kehko. Jezu hnao kymarokô pyra exiry. Mame Jezu poe ro senohne enahpyra mana. ¹⁸Kupuhpyrykôme sã Jezu mana Kuesêkôme exiryke. Zokome sã sytatose ipoetoryme kuahtao xine. Jezu poe isene toehse sytatose. Ritonôpo mûkuru imehxo mana. Tõsemãse ropa ynororo toorihxîpo. Tõsemâkapose ropa

Ritonôpo a emero motye Jezu ehtohme. Morara exiryke toorihse kuahtao xine ěsemânôko ropa sytatose kure Ritonôpo ritohme jũme. ¹⁹Tamoreme Tumũkuru poko Ritonôpo tōsenetupuhse, “Umũkuru tuisamehxo tyríko ase ysamo,” tykase Ritonôpo tyya rokene. Naeroro oxisã mã toto, Ritonôpo nymyryme Imũkuru exiryke. ²⁰Ritonôpo zehno seropôkô kynexine iirypyryme toehse toexirykôke. Toto zehno toehse Ritonôpo roropa. Naeroro ynara tōsenetupuhse Ritonôpo, “Umũkuru emero kurâkatôme tyríko ase oxiekyryme sã toto ehtohme ymaro,” tykase. Mame oxiehno pyra tyripose ropa toto eya tyehno pyra roropa, Jezu exixihmatopôpyry pokoino wewe pokona. Mame toto zehno pyra toehse Ritonôpo Jezu orihstopôpyryke, nonopôkomo, kapuaôkomo, enara.

²¹Amarokô roropa Ritonôpo epeme pyra mexiatose. Ise pyra mexiatose ipunaka, oorypyrykô pokoino. Oorypyrykomo a rokê tuaro mexiatose roropa. ²²Yrome seromaroro Tumũkuru orihstopôpyry pokoino ôsenetupuhtohkô tyrisenã sã tyrise ropa Ritonôpo a typyno oehtohkôme, tymaro oehtohkôme roropa, kure oehtohkôme iirypyryme pyra, zae rokê oehtohkôme, enara. ²³Naeroro âmorepatopôpyrykô onurumekara ehtoko. Orêpyra ehtoko Kuesêkô Jezu enetuputyry poko oya xine. Penekehpyra ehtoko ipoko. Osenekunohpopyra ehtoko ajoajohpâkô omiry etaryhtao oya xine. Ritonôpo maro oehtohkô momohnôko matose oesêkôme tonetupuhse oya xine exiryke. Omi kurâ etaryke oya xine menetuputyatose. Pake moro omi kurâ poko kuamorepatosene. Seromaroro moro omi kurâ poko imehnô amorepâko tuhkâkô mana emero pata tō poro.

Pauru erohtopôpyry Jezu poetory tō akorehmary poko

²⁴Tâkye ase jetuarimary poko âkorehmatohkôme. Kyrixtu toetuarimase typoetory tō kurâkatohme tyya, kukurâkatohkôme. Naeroro Kyrixtu akorehmâko sã ase jetuarimaryke ipoetory to kurâkary poko. ²⁵Ritonôpo poe Jezu enetupuhnanô akorehmaneme ase. Eya tyrohmanohpose ywy âkorehmatohkôme. “Jomiry kurâ poko imehnô amorepako emero pata tō poro,” tykase ya. ²⁶Pake Ritonôpo osenetupuhtopôpyry waro pyra seropôkô nexiase. Tuenikaroro rokê toh nexiase Ritonôpo ôsenetupuhtopôpyry poko. Yrome seromaroro tōsenetupuhtopôpyry tokarose rahkene tonetupuhnanomo a. ²⁷Ynara tōsenetupuhse Ritonôpo, “Juteutôkarama awahtao xine ro Kyrixtu amaro xine mana. Morara exiryke imaro tuisame exîko matose,” tykase. Moro poko onetapitopyra sexiataose aporo tokare pyra exiryke. Seromaroro moro omi kurâ ekarory se mana emero netaryme. ²⁸Morara exiryke Kyrixtu poko oturukehpyra ynanase emero pata tō po. Morotôkô amorepâko ynanase. “Tomeseke ehtoko Jezu enetuputyry poko ekurehpyra oehtohkôme. Tokurehse awahtao xine apotoimo htaka ytôko matose,” âko ynanase eya xine. Tuaro exiketô sã toto amorepâko ynanase Kyrixtu poko, ynara kary se yna exiryke Ritonôpo a, “Moxiã orêpyra mã toto Jezu pyno toexirykô poko, aomipona toexirykô poko, enara, Kyrixtu maro toehse toexirykôke,” kary se ynanase Ritonôpo a. ²⁹Naeroro erohnôko ase yronmyryme. Etuarimâko ase roropa repe. Yrome tyjमितunuru

ekarõko Kyrixtu ya mana tõmipona jehtohme. Emero motye orẽpyra Kyrixtu omiry mana. Mame tyjamtunuru ekaroryke ya imehnõ amorepãko ase.

2 ¹Jerohtopõpyry poko oururukõ se ase zuaro oehtohkõme. Yronymyryme erokuase ãkorehmatohkõme, Raotiseapõkõ roropa akorehmatohme, imehnõ roropa juaro pyra exiketõ akorehmatohme roropa. ²Yronymyryme toerohse ywy toto jamihtanohtohme, Jezu omipona toto ehtohme. Imehnõ Jezu poetory pyno toto ehtohme roropa. Itamurumehxo zae omi waro toto exiry se exiase orẽpyra toto ehtohme Jezu enetuputyry poko eya xine. Morara ahtao, “Otarãme enetupuhnõko ase,” kara exiko mã toto. “Otarãme aomipona se pyra ase,” kara roropa exiko mã toto. Mame Ritonõpo osenetupuhtopõpyry waro exiko mã toto, Kyrixtu nymyry waro exiko roropa mã toto. Ritonõpo namorepary emero pyra jarao kyya xine mana. ³Kyrixtu maro kuahtao xine Ritonõpo namorepatoh warohxo exiko sytatose. Tupimãkõ waro exiko sytatose. Ritonõpo osenetupuhtoh enetupuhnõko sytatose, zae ehtoh enetupuhnõko sytatose, zae pyra ehtoh roropa enetupuhnõko sytatose.

⁴Naeroro etatoko pahne, osenekunohpopyra ehtoko ajohpãkomo a. Otarãme imehnomo a mokaro omiry kure repe, yrome zae pyra mã toto. Ajohpe mã toto oenekunopyrykõ se toexirykõke. ⁵Amaro xine pyra ase taro, yrome opoko xine osenetupuhnõko ase. Tãkye ase roropa opoko xine, orẽpyra oexirykõke. Atakorehmãko matose orẽpyrahxo Kyrixtu enetuputyry poko oya xine. Moro poko tãkye kuhse ase.

Kyrixtu maro kuexirykõ poko

⁶Jezu Kyrixtu tonetupuhse oya xine oesẽkõme. Naeroro onytyorõmara ehtoko. Aomipona rokẽ ehtoko, oesẽkõme tonetupuhse oya xine exiryke. ⁷Wewe tymise exikety sã ehtoko. Orẽpyra Kyrixtu enetuputyryke oya xine orẽpyra aomipona exiko matose. Itamurumehxo enetupuhtoko. ãmorepatopõpyrykõ omipona ehtoko. Mame, “Kure mase Papa. Yna pyno mase ipunaka,” kakehpyra ehtoko Ritonõpo a.

⁸Tomeseke ehtoko typoetoryme oripopyra xine imehnõ ehtohme. Otarãme okuhtorỹko mã toto ahno namorepatopõpyry ke oenekunohtohkõme repe. Kytamurukõ omihpyry poko ãmoreparykõ se mã toto Ritonõpo se pyra aexityã omihpyry poko roropa repe. Toiparo rokẽ ãmorepatorỹko mã toto. Aomirykõ omipona pyra ehtoko Kyrixtu poe pyra toto exiryke. ⁹Ritonõpo Kyrixtu maro oxisã mã toto. Kyrixtu tonuruse ahnome kuamorepatohkõme Ritonõpo poko, aomiry poko, enara. Naeroro Kyrixtu eneryke kyya xine Ritonõpo waro sytatose. ¹⁰Amarokõ roropa Kyrixtu omipona awahtao xine Ritonõpo jamitunuru nae matose. Emero motye tuisamehxo Kyrixtu mana. Tõmiry aronanõ tuisary esẽme mana, joroko tamuru ime exiry motye roropa mana.

¹¹Naeroro Kyrixtu a tyjamtunuru tokarose oya xine oorypyrykõ poko pyra oehtohkõme, tonetupuhse oya xine exiryke. Tyrisenã sã oriatose

opũkõ sahkyryke pyra. Ôsenetupuhtohkõ tyrisenã sã tyrise exiryke eya oorypyrykõ jamitunuru tonahkapose eya rahkene. ¹²Tõpurihkase awahtao xine Kyrixtu omi poe ôsenetupuhtohkõ xihpyry tonahkase, oorihthokõ samo. Pake oehtopõpyrykõ tonẽse sã mana aorihtyã ekepyry zonẽtopõpyry samo. Mame Kyrixtu êsemãkapory ropa sã Ritonõpo a moro sã ôsenetupuhtohkõ tyrisenã sã tyrise ropa Ritonõpo a. Tyrisenã sã matose Ritonõpo jamitunuru enetuputyryke oya xine. ¹³Osemazuhme toorihse sã mexiatose. Ritonõpo poko pyra mexiatose ipunaka tyryrypyhpyke oexirykõke, Ritonõpo nymeropohpyry omipona pyra oexirykõke roropa juteutõkaramẽ oexirykõke. Yrome seromaroro ôsenetupuhtohkõ tyrisenã sã tyrise ropa Ritonõpo a. Tyrisenã sã matose. Kyyrypyrykõ tykorokase ropa Ritonõpo a emero porehme. ¹⁴Kuamoreme xine Ritonõpo nymeropohpyry omipona exisaromepyra sexiataose ipunaka. Kyyrypyrykõ tymerose sã monexiano Ritonõpo nymeropohpyry maro. Yrome morohne topehmase Jezu a emero porehme toxixihmase ahtao wewe pokona kymyakãkõme. Kyyrypyrykõ tykorokase eya rahkene. ¹⁵Morararo toorikyryke wewe pokona joroko tamuru jamitunuru tonahkapose eya, tyzehnotokõ esẽ jamitunuru tonahkapose, tuisa tõ jamitunuru roropa tonahkapose eya, enara. Jarao typoremãkapose toto eya imehnõ neneryme. Mame tõmipona tyrise toto eya typoremãkapose toto tyya exiryke emero neneryme.

¹⁶Morara exiryke imehnõ omiry se pyra ehtoko. Ynara karyhtao oya xine, “Mokarohne onõpyra ehtoko te, senohne onõpyra ehtoko. Toitoine êmepyyrae erohpyra ehtoko kuropõme exiryke,” karyhtao. Morara kananõ etary se pyra ehtoko. ¹⁷Morohne poko sexiataose Kyrixtu oehpyra ahtao ro. Yrome morohne ekuhtoh sã rokẽ kynexine imeĩpo ehtoh poko enetupuhpotohme rokene. Seromaroro Kyrixtu tooehse exiryke morohne poko se pyra toehse sytatoose. Kyrixtu omipona se rokẽ sytatoose toehse. ¹⁸Ajohpe exiketõ omiry onetara ehtoko ynara karyhtao eya xine, “Popyra matose yna sã pyra oexirykõke,” karyhtao. Morara kananõ onetara ehtoko. Ynara ãko roropa mã toto otarãme oya xine, “Omotye xine ase. Ritonõpo poe osenetyase,” ãko. “Tõsenepose Ritonõpo nenyokyhpyry ya. Inenyohtyã poetoryme rokẽ sytatoose. Seahmatone toto,” ãko roropa mã toto ajohpe rokene. Morara kananõ imehnõ motye osekarõko toh mã repe, tuisamehxo osekarõko roropa toh mã repe. Ajohpe rokẽ mã toto. Tamoreme rokẽ osenetupuhnõko mã toto. ¹⁹Yrome Kyrixtu Kuesẽkõ enetuputyry turumekase ropa eya xine azahkuru toexirykõke. Yrome kupuhpyrykõme sã Kyrixtu mana Kuesẽkõme exiryke. Zokome sã sytatoose ipoetoryme kuexirykõke. Kuokokõ wãtanohpõko Ritonõpo mana, kyzehpyrykõ maro, kymitykõ maro. Moro saaro kuokokõ wãtanohpory saaro kuakorehmatorỹko Ritonõpo mana orẽpyra kuehtohkõme tõmipona, tyrisenã sã kuosenetupuhtohkõ ehtohme roropa.

Kyrixtu maro kuosenetupuhtohkõ tyrisenã samo

²⁰Kyrixtu poe kuosenetupuhtohkõ xihpyry tonahse mana aorihtyã samo. Tyjamitunuru tokarose roropa kyya xine Ritonõpo a iirypyrymãkõ esẽ tõ

omiry poko penetara oehtohkõme, joroko tamuru omipona exiketõ omiry poko penetara roropa oehtohkõme. Morara exiryke iirypyrymãkõ esẽ tõ omiry poko penetara ehtoko. ²¹Ynara karyhtao eya xine, “Senohne poko pyra ehtoko! Mekarohne onõpyra ehtoko. Morohne anapoipyra ehtoko,” karyhtao eya xine, toto omipona pyra ehtoko. ²²Morohne enahketyme mã kehko. Axĩtao rokẽ mã kehko emero porehme. Morohne ahno omiryne rokẽ mana, ahno namorepatopõpyryme rokẽ roropa mana. ²³“Tuarohxo mokaro,” åko imehnõ mã repe. Yrome Ritonõpo nenyohityã ke Ritonõpo myakãmãko mã toto. “Kure mase,” kamexipõko mã toto imehnomo a Ritonõpo nenyohityamo a. Ynara åko roropa mã toto, “Ime pyra kuexirykõke oturusaromepyra sytatose Ritonõpo a. Inenyohityamo a rokẽ soturutone,” åko mã toto ajoajohpe sã rokene. Mame tokokõ ryhmãko roropa mã toto. Yrome typenatatohkõ onytyorõmara mã toto. Iirypyryme ro mã toto. Tyyrypyrykõ rumekary waro pyra mã toto. (Yrome tyoro matose Kyrixtu maro oexirykõke.)

3 ¹Tõsemãkapose ropa exiketõ sã matose Kyrixtu omipona oexirykõke. Naeroro Ritonõpo nekarory poko openetatoko. Kyrixtu poko openetatoko. Tummy maro Kyrixtu typorohse mana, Tummy saaro tuisame toexiryke. ²Naeroro seropõkõ penetatoh poko osenetupuhpyra ehtoko. Kyrixtu osenetupuhtoh sã osenetupuhtoko. ³Ritonõpo maro Kyrixtu oxisã osenetupuhnõko mã toto. Seromaroro toto osenetupuhtoh saaro osenetupuhnõko matose Kyrixtu omipona oexirykõke. Moro jarao pyra onenetupuhpynomo a, tonẽse sã eya xine mana. ⁴Õsenetupuhtohkõ tyrisenã sã mana Kyrixtu omipona oexirykõke. Orihpõyme exĩko matose Kyrixtu maro. Mame aepyry ropahtao, imaro matose oehnõko. Imaro tuisame exĩko matose.

Oehtopõpyrykõ tyrisenã samo

⁵Naeroro oorypyrykõ poko pyra ehtoko. Openetatohkõ poko pyra ehtoko roropa aorihtyã samo. Imehnõ nohpo poko pyra ehtoko. Atahmãkara ehtoko nohpo poko ehtoh poko. Imehnõ poko penetara ehtoko. Nohpo tomo, orutua kõ poko pyra ehtoko roropa. Iirypyryme imehnõ riry se pyra ehtoko. Toto poremãkapory se pyra ehtoko. Omipona xine xihpyry toto onyripyra ehtoko. Oyamene se xine pyra ehtoko. Kyamene se kuexirykõ xihpyryme Ritonõpo a mana. Ritonõpo myakãmãko sã matose openetatohkõ ke oyamene se xine awahtao xine. ⁶Naeroro tõmipona pyra exiketõ zehno exĩko Ritonõpo mana. Toto wãnohnõko mana. ⁷Amarokõ roropa osepeme mexiatose, iirypyrymãkõ maro. Morara awahtao xine mokaro penetatoh poko openetatose roropa.

⁸Yrome seromaroro oorypyrykõ irumekatoko. Imehnõ zehno pyra ehtoko. Imehnõ orutua maro oxipoko pyra ehtoko. Ajoajohpe pyra ehtoko roropa. Imehnõ oneunohpyra ehtoko. Omi xihpyry poko pyra ehtoko ipunaka. ⁹Kyrixtu tonetupuhse oya xine ahtao tyrisenã sã õsenetupuhtohkõ exĩko ropa mana. Iirypyryme oehtopõpyrykõ turumekase oya xine. Naeroro imehnõ onenekunohpyra ehtoko. ¹⁰Tyrisenã sã õsenetupuhtohkõ rĩko Ritonõpo

mana aomipona awahtao xine. Tōsenetupuhtoh sã kuosenetupuhtohkõ rîko Ritonõpo mana. Imeïpo toehtoh poko tuarohxo kyritorÿko Ritonõpo mana tysã kuehtohkõme, tuaro roropa kuehtohkõme. ¹¹Kuosenetupuhtohkõ tyrisenã sã toehse ahtao imehnõ eneryke kyya xine ynara kara sytatose, juteu tō mokaro, kara sytatose. Juteutōkara mokaro, kara roropa sytatose. Te, mokaro isahkatyãme mã toto, kara sytatose. Onysahkapÿ mokaro, kara roropa sytatose. Atamorepahnō mokaro, kara sytatose. Ituakyry mokaro, kara roropa sytatose. Te, imehnō namoto tō mokaro, kara sytatose. Tamoreme xine erohketō mokaro, kara roropa sytatose. Kyrixtu omipona mã toto. Enetupuhnōko mã toto, ãko rokē sytatose imehnō poko.

¹²Ōsenetupuhtohkõ tukurākase Ritonõpo a tōmipona toehse oexirykōke. Opyno xine itamurume kynexine omenekatone roropa typoenōme oehtohkōme. Oorypyrykō tykorokase mana. Naeroro imehnō pyno ehtoko. Kure toto riry poko osenetupuhtoko. “Imehnō motye ase kure,” kara ehtoko. Typoenō pyno nohpo ehtoh sã tomeseke ehtoko imehnō maro. Penekehpÿra ehtoko roropa imehnō kure ehtoh eraximary poko oya xine. ¹³Imehnō akorehmatoko, zae toto ehtohme. Imehnō rypyry ikorokapotoko Ritonõpo a. Osenetupuhpyra ehtoko popÿra oritopōpyrykō poko eya xine. Oorypyrykō korokatopōpyry sã Kuesēkomo a toto rypyry ikorokapotoko roropa. ¹⁴Morara awahtao xine zae matose. Morara awahtao xine imehnō pyno ehtoko roropa. Toto pyno awahtao xine atapiakara matose, otumoxike pyra roropa matose. Kyrixtu poe osenetupuhnōko sytatose zae ehtoh poko. Naeroro atapiakara sytatose. ¹⁵Kure rokē imehnō tyritoko. Torētyke pyra matose exîko Kyrixtu poe. Toahmase matose Ritonõpo a torētyke pyra oehtohkōme, oximaro oehtohkōme toiro zoko samo. Naeroro, “Kure mase,” kakehpÿra ehtoko Ritonõpo a. ¹⁶Kokoro rokē Kyrixtu omipona rokē ehtoko ipunaka. Ipoko osenetupuhtoko okurohtao xine. Zae imehnō amorepatoko Jezu Kyrixtu poko. Zae ehtoh poko ituarōtanohpotoko toto. Oeremiatoko ipoko. “Emero motye tuisame mase Jezu,” kary se awahtao xine, “Omoro rokē mase yna esēme Jezu,” kary se roropa awahtao xine te, tãkye awahtao xine okurākakatopōpyrykō poko, morohne poko oeremiatoko Ritonõpo netaryme. “Kure mase,” kakehpÿra ehtoko roropa okurohtao xine. ¹⁷Emero rokē ahtao Kuesēkō Jezu omipona ehtoko. Emero poko oturutoko imaro. Imehnō maro otururukohtao oturutoko Jezu netaryme samo. Typynanohse oexirykōke Jezu a, “Kure mase Ritonõpo,” kahtoko Kumykō Ritonõpo a.

Jezu poetory zae ehtoh poko imehnō maro

¹⁸Nohpo tomo, oniokō omipona ehtoko. Jezu poetoryme oexirykōke zae matose oniokō omipona awahtao xine.

¹⁹Orutua komo opyxiākō pyno ehtoko. Tohne pyra ehtoko toto maro. Opre toto onurupyra ehtoko.

²⁰Poetohti, Jezu poetoryme oexirykōke omykō omipona ehtoko. Asakō omipona ehtoko roropa. Morara awahtao xine Kuesēkō zamaro matose.

²¹ Typoenõke exiketomo, opoenõkõ anaosanumanohpopyra ehtoko ozehno xine pyra toto ehtohme, toto onyporemâkapopyra roropa oehtohkõme.

²² Tosêke exiketomo, oesêkõ omipona ehtoko toto neneryme rokê pyra. Kure oekarotohkõme rokê pyra toto omipona ehtoko. Onekunohto pyra roropa ehtoko, Kyrixtu omipona se oexirykõke. ²³ Mame oerokurukõ zuno pyra ehtoko. Akîme pyra ehtoko roropa. Seropõ poetoryme rokê pyra matose erohnõko. Kuesêkõ omi poe roropa matose erohnõko. ²⁴ Kyrixtu Kuesêkõme nymyry mana. Aomipona erohnõko sytatose. Kuesêkõ kuepehmatorÿko mana. Zae rokê kuahtao xine zae rokê kuepehmatorÿko mana. ²⁵ Yrome zae pyra toerohse kuahtao xine, moro sã kuepehmatorÿko roropa Ritonõpo mana, kyyrypyrykõ ehepyryme, zae Ritonõpo exiryke kypoko xine.

4 ¹ Typoetokamo, zae ehtoko opoetory tomo a. Kure rokê tyritoko toto. Tosêke roropa matose kapu ao. Moro poko wenikehpyra ehtoko.

Amorepatyã poko

² Oturukehpyra ehtoko Ritonõpo a. Tuario ehtoko ôtururukohtao, “Kure mase,” kakehpyra ehtoko Ritonõpo a. ³ Mame ôtururukohtao Ritonõpo a, yna poko oturutoko, “Tupime pyra Pauru tã otururu tyriko imehnõ amorepatohme ômiry poko, Kyrixtu orihthopõpyry poko yna myakãme,” kahtoko. Morohne poko imehnõ zururuke ya âpuruhpyry tao ase seromaroro. ⁴ Yrome zae ro ya mana Kyrixtu poko imehnõ amorepatyã ya. Naeroro ynara kahtoko, “Pauru tã akorehmako Papa, kure imehnõ amorepatohme, ômiry enetupuhtohme eya xine,” kahtoko Ritonõpo a.

⁵ Jezu poetory tã kara maro awahtao xine tuaro ehtoko toto maro, penekhepyra toto ehtohme. Ekurehpyra ehtoko. Etary se toto ahtao zuruko toto Jezu Kyrixtu poko. ⁶ Kure rokê oturutoko imehnõ maro zuaro exiketõ samo, oetarykõ poko penekhepyra toto ehtohme. Mame kure imehnõ ezukuru waro exiko matose ekaroporyhtao oya xine, Jezu poko onenetupuhpynõ ezukuru waro oehtohkõme roropa.

Aosekazumatopõpyry ropa poko

⁷ Yna akorõme Tikiku mana. Yzamaro mana itamurume. ÿme erohnõko mana yna maro Kuesêkõ poetoryme. Aytoryhtao oya xine ourutorÿko mana ypoko. ⁸ Morara exiryke mokyro aropõko ase oya xine, âtäkyematohkõme yna ehtoh poko oururukõke eya. ⁹ Imaro Onezimo ytõko roropa mana. Jezu poetoryme ynororo zae roropa ynororo yronymyryme. Yzamaro mana pitiko rokê pyra. Oekyrykõme mã ynororo. Oya xine toytose tahtao xine ourutorÿko mã toto, taro yna ehtoh poko, porehme.

¹⁰ Arixtaku taro mana, ymaro âpuruhpyry tao. “Kure pana matou?” kary se ynororo oya xine. Maku roropa morararo. Maku Panape akonome mana. Otarãme ytõko roropa mana oenese xine. Ynymerohpyry ipoko mapoiatose. “Toytose oya xine ahtao eahmatoko atapyikõ taka aytotohme,” ase, ymeroase onenerykõme. ¹¹ Jozue roropa, “Kure pãna matou?” kary se oya xine mana.



(Kor 4.6)

Jozue esety akorõ Juxitu. Juteu tõ mokaro oseruao ro erohnõko mã toto ymaro imehnõ amorepary poko Jezu enetuputyry poko, tosëkõme Ritonõpo enetuputyry poko, enara. Jakorehmaryke eya xine tãkye ase ipunaka.

¹²Eapura roropa, “Kure pãna matou?” kary se oya xine mana. Mokyro oekyrykõme roropa mana. Jezu Kyrixtu omipona exiketyme roropa mana. Oturukehpyra ynororo yronymyryme Ritonõpo a opoko xine Jezu enetuputyry onurumekara oehtohkõme. “Orëpyra Koroxipõkõ tyriko Papa, tuarohxo toto ehtohme zae ehtoh poko. Õmiry zae ehtoh waro tyriko toto. Õmipona ipunaka tyriko toto roropa,” åko ynororo Ritonõpo a opoko xine. ¹³Eapura erohtopõpyry ekarõko ase oya xine zuaro jexiryke. Yronymyryme toerohse åkorehmatohkõme, Raotiseapõkõ akorehmatohme roropa, Ijaporipõkõ roropa. ¹⁴Ruka roropa, “Kure pãna matou?” kary se nase oya xine, Temaxi roropa. Opi warõme roropa ynororo Ruka. Yna zamaro ynororo pitiko rokë pyra.

¹⁵“Kure pãna matou?” kahtoko Jezu poetory tomo a Raotisea po. Morara kahtoko Nipa a imarõkomo a roropa, Jezu poetory tomo a roropa õximomyrykohtao itapyĩ tao. ¹⁶Sero nymerohpyry tonese oya xine ahtao aropoko ropa Jezu poetory tõ neneryme Raotisea pona. Morararo nymerohpyry, Raotiseapõkõ neneryme isekerematoko roropa taropose ahtao oya xine Raotiseapõkomo a. ¹⁷Ynara kahtoko



(Kor 4.17)

Akipu a, “Oerohtoh onurumekara exiko õtyhkary ponāmero, Kuesēkō nyrohmanohpotopōpyryme exiryke,” kahtoko.

¹⁸Jemary ke nymyry sero merōko ase, kure pāna matou? Ywy ase Pauru. Wenikehpyra ehtoko āpuruhpyry tao jehtoh poko.

Kure rokē oriporykō se ase Ritonōpo a. Enara.